

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³ Lëew ga rnee ganle cho nac Jesús (meñ ne briequia lo xti rey David ne laa me goc miech lo guidzliu; ⁴ sañgue Espíritu Sant, pxobneñ me ganle Xpëed Dios nac me; miñ co gane brieeban me).

⁵ Zeene biaad Jesús, ga pxobneñ me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeeña gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sañgue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnañ ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús meñ ne rnabey, tibaque noxco me to, me nac meñ ne gacnieñ to zeeña peet zhgab ctsebde to.

8-9 Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por miñe quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacniën me to; ¹⁰ ni tibaque rnab naa telne zneedz me diidz gdziñ tib dze ne grieelo guial naa i guialgan naa to. ¹¹ Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tiblique gac guic to dziitsraa so to. ¹² Ni scagaa tipse gac ne ziodiidz ne zha nac Xtiidz Ndzon Dios, miñe rliladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa ragual cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëgaa zha ne peet rienda. ¹⁵ Miñcocxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib

zlaa zho lo xtoꞓ zho! Laa guieꞓnzaac co no niina par grëse miech. Glose lo zha Israel bdziṇa, laa niina laaw quiadziṇ lo grëraa miech, zeena grëse zho gbig sëeb xnëz Dios. ¹⁷ Sac goṇ, lëë Diidz Ndzon rii rlu zha rbiire rcaania Dios miech, rsanmbe me zho lo doꞓ rbiire riaanwen zho lo me: totsaque nli dib zdoo zho gliladz zho miṇe nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rliladz zho miṇe nac Xtiidz me.”

Xtoꞓ miech

¹⁸ Ndionle ne ganle no guieꞓnë ro ne csiaab Dios ygaa grëse miech ntseeb, miech ne nëd gac-wen, ni desde gbaa cxele me guieꞓnë ne ygaa zho; sac por xquieꞓntseeb zho rsaand zho gacnaṇ grëraa miech miṇe nac diidzli.

¹⁹ Grë zha ntseeb, nanle zho zha nac Dios, sac mezhal blu lo miech zha grieelo gunbey zho me.

²⁰ Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane ruṇ me, gase rlu ganle cho nac me. ¡Gase rlu ne nli me nac Dios, ni gdziṇd dze ne lozh xpoder me!

Gacxe waa grë zha ntseeb, ib tedlaad zho lo guieꞓnë ne csiaab me ga; ²¹ sac goṇ niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nanṇ zho gdeed zho lo me. Laa ne rzac zho na rien zho pe ruṇ zho, leꞓ pcow xquieꞓrien zho; rzac zho na lëew ga, gun zho ncuaane guiaabtaa guic zho. ²² Niicle ne rzac zho zharien zharac nac zho, per zha nac miech ne quialoozhraa lo xquieꞓnxen; ²³ sac goṇ laa ne gunbey zho guieꞓndzon ne rap men

ne nacpaa Dios nguiamban, leḷ rsilo zho rzaa zho grē mdio ne niaa zigne rlu samiech guidzliu zho, grē mdio ne niaa zigne rlu grē ma ne rsiibe, grē ma ne rzē tap ni, grē ma ne rzēleḅ lo liu; leḷ grē ncuaaḅ co ziegaḅ zho laa ne gleynie zho meḅ ne nacpaa Dios.

²⁴ Miḅcocxe nagon waa, rsaanladz Dios zho laa zho zienaḷ grē ncuaaḅe ndzinlid ne rzoobladztaa zho. Grē ncuaaḅe ntoladzdox ne ruḅ zho, lēēque zha ruḅnguzee zho rguitnie zho xcuerp zho. ²⁵ Sac laa ne gleynie zho diidzli miḅe rnabey Dios, leḷ miḅe rnee zha ne rquidie rleynie zho; leḷ grē ncuaaḅe bzaale Dios, ncuaaḅe psanḷe me, ncuaaḅ co ziegaḅ zho, lo grē ncuaaḅ co ziequiitsgzhib zho; laa ne yquiitsgzhib zho, gleynie zho meḅ ne nac Dios mban, meḅ ndzon ne psan grētaa ncuaaḅe no. ꞑDiosse rieguialḷ guḅnon miech, meḅ co rieguialḷ tibaque goolḅie zho! Sca rieguiala.

²⁶ Ne sca nagon nac zho, gane psaan Dios zho laa zho ruḅ grē guielyozh, ncuaaḅe ngubeeguielḷto ne rieguialḷdraa guḅ miech. Grē wnaa laa ne gdeed zho diidz gnee tsieel zho lo zho, leḷ lēēque sawnaa zho rquiangob zho, laa zho zienaḷ grēraa guielyozh; ²⁷ grēgaa mgui, laa ne gnee zho lo wnaa ne nac tsieel zho zigne biaan no gaca, leḷ lēēque sabgui zho rzoobladz zho. Ncuaaḅe mbixladz ruḅ zho, rquiangob zho lēēque sabgui zho; ni ne sca ruḅ zho grē ncuaaḅ co, lēē miḅe rdziniaa zho nac grē guielguidz yozh ne riaanḷ lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaanḷ lo grē zhgab yozh ne no guic zho, no

zdoo zho, miṅ co ne scataa nac zho. ²⁹ Nroobdoo
nac xtol zho, sac:

rsacsixuu zho samiech zho,
rzoobladz zho ncuaane quianied zho,
racntseeb zho lo samiech zho,
nē rac zdoo zho ran zho stib noded samiech zho,
rut zho samiech zho,

rtsidil zho samiech zho,
rquidie zho samiech zho,
rquiadiidzguizh zho samiech zho,
miech yozh nac zho,

³⁰ rneenē zho samiech zho,
rquiabro zho lo samiech zho,
racniats zho lo samiech zho,
rlu zho ncuaane rapd zho, ncuaane nacd zho;
rlēenie zho Dios,

rio zho rbeebey zho grē guielntseeb,
rond zho xtiidz pxoz zho,
rond zho xtiidz xniaa zho,

³¹ racladzd zho gon zho diidz,
ruṅd zho miṅe rnee zho,
rleynied zho samiech zho,
ruṅd zho samiech zho perdon,
rquiad zdoo zho samiech zho.

³² Niicle ne nanpaa zho zha rnabey Dios none
gban miech, niicle ne nanpaa zho grēse zha ne
ruṅ guielntseeb, ib tedsod znitlo zho; ni laa zho bii
quiayuna, ni haxta rley zho ran zho cho grēraa zha
ne ruṅ grē miṅe ruṅ zho.

2

Xquielwxtis Dios

¹ Ib tedsod no to gnë: “iZha ntseebtaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co yгаа zho guielnë ne csiaab Dios, ye zho rieguial min co. ² Ndion ne ganle Diosi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³ Zha ne sca rlozhd gzee zdoo pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielnëdox ne yгаа zho gal dze ne laa me gun guielwxtis. Ni xquielwxtissi me, zigne rieguial gaca sca gun mew.

⁶ Gal dze co, laa me gdeed mine rieguial yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdziind dze lozh. ⁸ Sangue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа

zho tib guielnēdox; ¹⁰ sangue grē zha ne rban zacse, zigtaa zha Israela, zigtagaa zha stib guiedza, ible zgaa zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grēse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grē zha ne beenbeyd xley me, zunquizh me zho grē xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa miñ nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grē xtol zho; sac niicle ne runbeypaa zho xley me, per tel lozh ga mband zhow. Nanpaa zho pa miñ wen, ni tel lozh ga rond zho diidz gun zhow; sac gon, ledxe por ne gacnandse ne ley waa laa Dios ycaaniale ne, sinque none gban new.

¹⁶ Zdziñ tib dze, zeene laa Dios cxeel Jesús, gunquizh me miech grēse dol ne been zho tib tib zho, niicle miñe mazdraa rzac zho ngueets zhlian been zho; sac sca rnabey Dios gaca, ni miñ co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios.

¹⁸ Nanwen to zha racladz Dios gban to, nanpaa to pa miñ wen sac pseed to xley me. ¹⁹ Miñ co masaque rzac to to cseed zha ne no lo ncow, grē zha ngoopdol. ²⁰ Masaque rzac to to rienraa zha cseed to grē zha ne peet gacd, to rienraa zha quixbiini to grē zha ne peet riend; sac rzac to ne nan to ley, tose nac

zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ipe nac dzigo rwide to mine run to?

Conque to name rnee lo miech cuand zho, ni rlozh ga toque quiaban. ²² Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to gre mdio, ni rio to rieban to yadoo ne zob gre mdio co.

²³ Rlozhd gacniats to rzac to quiayunnon to le Dios ne nan to ley, ni nande to gon, lel quiaguitnie to le me ga, sac mbande to zigne nac ley. ²⁴ Mine noyunpaa to i ga gon raquiet lo Xtiidz Dios, zaatne rnee: "Por xtol to, gre zha zit laa zho rneene Dios."

²⁵ Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac gre zha zit ne runbeyda.

²⁶ Nana, zha zit ne rioxco rban zigne nac xley me, i niacxe rieguald dzigo guianzuiuu zho lo Dios? Sanzuiuu me zho gon. ²⁷ Golgacnan sca ganle, glole zha zit co gon guianzuiuu lo Dios, ledle to ne nanpaa to zha racladz Dios gban to, nanpaa to mine psan Dios diidz yгаа to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuule lo Dios. ²⁹ Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grese zha ne znu nac, nziuu zho lo Dios, niicle telne rzac to peet nond zho.

3

¹ Nana, ¿pa lugar nadien ne riaannon zha Israel lo grëraa zha stib guiedz? ¿Pa rquiin ne scataa rio zho bey? Zootle lëë lalaquew tel niaca mine niacd zho zha Israel. ² Per led scada, no pe nacne non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsëë me xtiidz me, mine bneele me lo zho. ⁴ Niicxe tel zharaa quiayunctal miech xtol zho, sangue Dios ctsëëd me xtiidz me. Zigne zhobneeque lo Xtiidz me, zaatne rnee: “Mine rnee Dios, diidzli naca; niicle zha ne gacladz, guiend pe ncuaane glisqui zho lo me.”

⁵ Sca nac Dios, gacxe waa rnee me grëse zha ne runctal xtol, riegual yгаа zho guielnë ne cxeel me. Ga nagon, rlu ne mine nac diidzli, min co run me. Nana, ¿pe ziab ne nonguield mine run me ga?

⁶ Mine nonguiel ga gon run me, sac tel gdziguien me grë zha ne runctal xtol, ¿zha naczhe guielwxtis ne dzigo gun me?

⁷ Nana, nogaa zho gnë, ¿per pe nacne glisqui Dios dol ne rdziuun ne, ni tel por lëew rlu ne diidzli nac mine run me? ⁸ Per telne sca naca, rrieequia dzigo ib none gunctal ne xtol ne parne yquiaraa zdo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne riegual zho.

Grëse miech, ngoopdol nac zho

⁹ Nana, ¿pe zdieets ne dzigo ne nac ne zha Israel, nziuuraa ne lo grëraa miech stib guiedz? ¿Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa

zha stib guiedza. ¹⁰ Zigne zhobneeque lo Xtiidz Dios, zaatne rnee:

¡Guiend miech ne zienal_{paa} miñe racladz Dios!

¡Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho;

niapse guiel_{ntseeb} zienal_{zho}.

¡Guiend zha ne zienal_{miñe} racladz Dios!

¡Ni tib zho guiend!

¹³ Ro zhow,

masaque been_{cuent} naca zig nac len_{grë} baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel_{dox};

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien_{pa} tsiegut zho samiech zho;

¹⁶ loxaque guiel_{në}, loxaque guiel_{zi} rsañ zho zaatne rded zho.

¹⁷ Ib nañd zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guiel_{nëdox} ne ygaa grë zha ne run_{bey} ley ni mband zho zigne naca, le_l run_{zho} grë_{taa} guiel_{ntseeb} zig nac grë miñe goquiet nu. Ni niicle grë_{raa} miech ne run_{beyd} ley, scaque ngoopdo_l nac zho, ni ro zho guiend pe guiab zho lo Dios. ²⁰ Golgañ sca gan_{le}, grieelod guiaa_nmbene lo Dios, niicle paraa yquia ne guñ ne miñe rnee

ley; sinque par guien ne ganle ne ngoopdol nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grêque guits ne ziaad ley, lo grê guits ne pquiaa zha ne biadteed Xtiidz Dios padzeela, ga raquieta.

²² Grêse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grêse ne miech ngoopdol nac ne lo Dios, ni palal rdzieeld gdziñ ne lo xquieindzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grêse xtol ne, laa ne biaanwen lo me. ²⁵ Laa me been miñ co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lëe men co nac Jesús; gane niina grêse zha ne gnalo men co, zun me zho perdon grëtaa dol ne pxecw me been zho. ²⁶ Ni tib dol rapd me, ni scaque grê zha ne dib zdoo gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por miñe bdziuund new, sinque por grëtaa miñe bded Jesús. ²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho miñe rnabey ley.

²⁹ Nana, ¿pe zha Israelse sca ycaania me? ¡Lëda gon! Grêse miech, sca ycaania me zho. ³⁰ Sac gon tibeyse ran Dios ne grêse ne; zigtaa zha Israela,

zigtagaa zha stib guiedza, sanmbe me ne lo grē xtol ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne riladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Lēda! Telne scaw, nrieelo niacniats me (niicle ne nēz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtold.

⁴ Zig nac tib zha ne run dziin, dimi ne razh zho ible rieguial zhow, rate zhow ga. ⁵ Sangue Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguiala. ⁶ Ye rey David bzeet guielbley ro ne rgaa zha ne sca rcaania Dios, ⁷ rēb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtol zho, glisquidraa mew.

⁸ ¡Wen zie zho sac gunquizhdraa me zho grē xtol zho!

⁹ Nana, ¿pe loxaque grē zha ne nose bey zrieelo ygaa guielbley co, te ye grē zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtold; ¹⁰ sac gon gard pe bey ne tso me zeeņe pcaania Dios me. ¹¹ Pcaaniale

Dios me dzigora a bio me bey. Lega laa me biose bey co, zeena glu ne laa Dios pcaaniale me porne dib zdo me bnalo me Dios. Mincoxe waa, Abraham nac dad lo grese zha ne nod bey, ni dib zdo zho rnalo zho Dios; ni scagaa Dios, rcaania me zho zig tib zha ne peet xtold. ¹²Ni meque nac dad lo gre zha ne no bey ni dib zdo zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³Psanle Dios diidz lo Abraham ne me guiaan nie guidzliu, gre me zha ne grieequiaraa lo xtii me; guiabd ne togo porne been me mine nac xley zha Israela, sinque ne dib zdo me bnalo me Diosa.

¹⁴Nana, tel niaca zha ne gunse mine nac ley, zha cose ygaa min co, rrieequia dzigo zhlése ga bnalo Abraham Dios, niicle diidz ne psan Dios lo me ga, nondaqew. ¹⁵Sac nac ley gon, zha ne gunda zigne naca, laa Dios csiaabzi zho; laa zaatne guien d gaa ley, gacd guiab zho cho noguiitsa.

¹⁶Ne scacxe waa nac ley, gane niina leese mine no gun ne nac dib zdo ne gnalo ne Dios par ygaa ne mine psanle me diidz ga. Grese ne ygaa min co, per nacdraaw dien cho zienal ley, cho zienaldgaaw, sac mine nonraa, dib zdo ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grese ne, ¹⁷zigne reb Dios lo Abraham: "Laa naa bzo luu, luu gac dad lo nzian dii miech." ;Lee Dios co nagon bliladz Abraham, me rbeeban gre mengut, ni niicle haxta gre ncuane guien d, saa mew!

¹⁸Ndaldox reb Dios gac lo xtii Abraham, ni bliladz Abraham mine reb Dios ga. Niicle ne zootle

led ncuaa_{ne} gacda, per me dib zdoo me bliladz me ne zaca, ni scagaa bdzi_n dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap m_{eed}. ²⁰ Ib goc chopd guic me niab me bod nlid niac mi_{ne} bnee Dios ga, sinque dzigole dib zdoora me bnalo me Dios; haxta rdeed me xquizh lo Dios, ²¹ sac na_npaa me me_n nroob nac Dios zu_n me mi_{ne} psan me diidz ga. ²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zee_na gacndio_n ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, me_n ndzon ne rnabey ne; ²⁵ me_n ne gut ga bdiizh me xtol_n ne, me_n ne brieaban ga, par glu me nli psan_mbe me ne n_{ez} lo Dios.

5

Jesús rsan_mbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, me_n ndzon ne rnabey ne. ² Sac por gr_{et}aa mi_{ne} bded Jesús, laa ne bgaa guie_nzaac rii nacie me ne, ni ib csaand ne me. Tib guie_nbley nrooba lo ne, sac ndio_npaa ne ib zgaa ne lo guie_nndzon ne no me.

³ Ni scaquegaa nagon none gley ne ze_{ne} pe guie_nne ne nodzian_n ne; sac ndio_n ne gan_{le}, ga cseed ne l_{eb} ne dziits so ne lo mi_{ne} rliladz ne. ⁴ Ni ze_{ne} sca dziits so ne, zliladzraa ne dib zdoo ne; ni ze_{ne} dib zdoo ne rliladz ne, zacna_npaa ne ib zgaa ne

mine rli^ladz ne. ⁵ Ni ndion^paa ne zгаа new, sac blu Dios rleyⁿie me ne, pxeel^l me Espiritu Sant nacie ne.

⁶ Lëë^taaque zeene rdziel^draa miech zha gun^z zho par guiaaⁿmbe zho lo dol^l, hor co laa Dios pxeel^l Jesús, biaad me gut me bdiizh me xtol^l ne nac ne miech ngoop^dol.

⁷ Ndionⁿ ne gan^le, niicle tib miech ne peet xtol^da, tib miech ne mazdraa wena, led lega grieequiad tib zha ne cueel^ladz xquiel^mban guet por zha.

⁸ Saⁿgue Dios gonⁿ, niicle ne miech ngoop^dol nac ne, blu me gan^le pa lotaa nquial^ladz me ne, pxeel^l me Xpëed me Jesús, menⁿ co bleel^ladz xquiel^mban gut me xcuent ne.

⁹⁻¹⁰ Gotsaa gwi ne gan^le, zha nactaa guielⁿë ne bded Jesús psan^mbe me ne lo xtol^l ne, psan^wen me ne lo Dios; ni scaque nagonⁿ, ible me csilaa ne lo grë^taa guielⁿëdox ne csiaab Dios ygaa grë miech ntseeb. Ne nligaa, csaand me dzianⁿ ne guielⁿë co; sac gonⁿ, tel^l scataa mine beenⁿ me por ne zeene nac ne tib miech ngoop^dol, zeene scataa ntseeb goc ne blëënie ne Dios, ¿pe le^l na dzigo ne laa ne biaan^wenle lo Dios, laa ne biaan^le zig tib zha ne peet xtol^d? ¹¹ Gacxe waa, niina ne psan^wen Jesús ne lo Dios, none ine gley ne ne laa ne ngable lo Dios.

Zha nacie biaan dol

¹² Znu gonⁿ nacie laa dol^l biaan: por mine been Adán bind me xtiidz Dios, minⁿ co nac ne biaan^a. Ni por lëew pquiaqui laa guiel^gut biaan^aque, blozh ga grëse miech laa zho ret, sac grëse zho, tsod zha ne gun^tald xtol^l. ¹³ Desde hor co biaanⁿ runctal miech xtol^l zho. Grëse miech ne bre lo guidzliu,

desde Adán haxta len dze ne laa Moisés pcaania ley, beenctal zho xtol zho, niicle ne guiendpaa tib ley hor co nlu ne doła. ¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne bиаad stib men ne beend ni tib falt, por min co laa Dios rquia zdo ne grëse ne, laa me rneedz tib guielmban ndzon lo ne; lëë men co nac Jesús. ¹⁶ Tibaque nac dol co been Adán, per grëse miech biabzi; sangue Jesús zeene laa me bиаad, grëse ne ne nac ne miech psilaa me ne lo grëtaa xtol ne, psanwen me ne lo Dios. ¹⁷ Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne bиаad Jesús, zrieelo ygaa ne tib guielmban ndzon. Guielmban ne ral zdo Dios gdeed me lo grëse zha ne gbig lo me gun me zho perdon. ¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús bиаad, pquia zdo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmban ndzon. ¹⁹ Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac gre falt ne noyun miech lo Dios. Per niicle scataa

nac grē dol co, per blu Dios ganle mazdraa rquia zdoo me miech. ²¹ Masaque bnabey dol miech, pxeela zho nēz ne nitlo zho; saṅgue zeene laa Jesús biaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcoraa me ne? ² ¡Lēdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nēz lo dol.

³ Golgan ganle, zeene laa ne bziaab xnēz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieegan me. ⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo miṅe goc ne ga, zeena ygadoodraa ne lo dol; ⁷ sac gon, deque bnitlo grē miṅe goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdzindraa dze guet me. Grieelodraa pe guṅ guielgut me.

¹⁰ Tibaque vuelte gut me bdiizh me xtol grēse miech, saṅgue niina mban me ni Dios mbannie

me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuaane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guielntseeb; sinque golsan to lадznia Dios, ine golgun grë mine racladz me. Golguien ganle, laa to gutle lo grë dol, Diosle mbanle to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaane gunctal xtol ne? ¡Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brie ladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey

me, zeena lozh guiaanmbe to zigne racladz me.
 20 Zeene scataa ngadoo to lo dol, ib wbande to zigne rnabey me.

21 ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuaane been to hor co.

22 Sangue niina, ne laa to brieete ladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdziñd dze lozh.

23 Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdziñdraa dze lozh.

7

1 Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

2 Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. 3 Nli nonguiel da ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led doldraaw yguib zho stib zha ne ctsieelnia zho.

4 Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëegaaw grieelod gnabeya to. Jesús, men ne brieaban ga, mele nac tsiel cub to niina. Niinasi, zrieelole gban to zigne racladz Dios; 5 sac glo (zeene scataa bdziunctal ne xtol ne, bdziun ne grëtaa ncuaane nonguiel draa niicle ne

ndionpaa ne pe nac minē zhobnee lo ley no dziuun ne), niapse grē ncuaanē nxeel ne zaatne nitlo ne, ncuaan co bdziuun ne. ⁶ Blactaa bgadoo ne lo ley, sangue niina rrieequia gutle ne nēz lo ley, laa ne mbanle zigne rnabey Espíritu Sant.

Rca dol gac minē rnabey ley

⁷ Nana, ¿pe zdzieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.” ⁸ Zeene gocnan naa zha nac ley, dzigora a bien naa niapse dol nac minē noyuu naa; sac zeene guiend ley, rlud pe nac dol.

⁹ Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayuu naa. ¹⁰ Nli laa ley biaan zeena guien ne zha grieelo ygaa ne guielmban, per lel bluw ne raguial naa nitlo naa sac ngoopdol nac naa. ¹¹ Ne nligaa bdziitnie dol naa, minē rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa. ¹² Niicle ne scaw, per Dios psana ni rquiin grē minē zhobnee low.

¹³ Nana dzieets ne: conque telne wen nac ley, ¿zha nac dzigo ne lëëpaaw rlu ne riogual ne guet ne? ¡Coo, led scada! Sinqe znu naca: dol pteedquie ne ladznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol. ¹⁴ Gotsaa gwi ne ganle wen

ley, led leyd rxin̄ sinque ne rxin̄; sacne rrieequia ngadoo xcuerp ne lo dol̄.

¹⁵ Tel̄ naa, rien̄d naa pe nacne znu rac naa, niicle ne racladzpaā naa gun̄ naa ncuaane nonguiel̄ per nēda, lel̄ ncuaane rzoobladd naa min̄ co run̄ naa. ¹⁶ Grē ncuaane run̄ naa, now rien̄paa naa nonguiel̄da; haxta guic naa, zdoo naa, rien̄ naa wen ley sinque naa quiaguits min̄e rnabeya. ¹⁷ Nana, niicle ne rien̄ naa scaw per gacd pe gun̄ naa, sac ngadoo xcuerp naa lo dol̄, masaque dol̄ rcheep naa run̄ naa ncuaane ndzinlid. ¹⁸ Rien̄ naa miech ngoopdol̄ nac naa, ni palal ncuaane ndzinli gacd gun̄ naa; niicle ne racladz naa gacwen naa, per rrieeeloda. ¹⁹ Zeene racladz naa gun̄ naa ncuaane rquiin̄, per rrieeelod gun̄ naaw; laa zeene ni naa gundraa naa ncuaane ndzinlid, lel̄ min̄cole run̄ naa. ²⁰ Ni ne znu lel̄ grē ncuaane racladd naa, min̄ co run̄ naa, gase rlu ne led naadse quiayun̄ grē ncuaan̄ co; sinque dol̄ quianabey xcuerp naa run̄ naaw. ²¹ Rien̄ naa niicle ne racladzpaā naa gun̄ naa ncuaane wen, per lel̄ guiel̄ntseeb run̄ naa. ²² Zdoo naa, guic naa, rleynie naa Xley Dios, racladz naa gban naa zigne rnabey me; ²³ per dzigo rtse dol̄ lo naa, rrieeelod gun̄ naa ncuaane nonguiel̄. Masaque dol̄ rnabey xcuerp naa, racladda gun̄ naa ncuaane rnabey Dios; sac ngadoo xcuerp naa lo dol̄.

²⁴ ¡Probsaxe naa, znutaa nac xcuerp ngoopdol̄ naa nu! ¿Cho samiech ne dien̄ grieeelo csilaa naa low; sac ncuaane gnitlo naa min̄ co mazdraa rdziladza?

²⁵ ¡Xquizh Dios pxeel̄ me Jesús biaadsilaa me ne lo dol̄!

¡Jesús nac men ne psilaa naa!
 (Znu nagon rzac naa: rien naa nonguiel gun naa
 mine nac Xley Dios, per xcuerp naa lel laaw zienal
 mine rnabey dol.)

8

None gban miech zigne racladz Espíritu Sant

¹ Laa ne gocndion nasca ganle, zha ne ngab lo
 Jesús ndziibdol draa zho, ² sac zha ne ngab xnéz me,
 laa Espíritu Sant psilaale zho lo dol, laa me psilaale
 zho ladznia guielgut, laa me bdeedle tib guielmban
 cub lo zho.

³ Wlaltaa ib brieelod ley nsilaaw ne lo dol,
 gane mazd laa Dios pxeel Xpëed me biaadsilaa
 ne. Brieelod ley, sac grëse miech laa ne tsienal
 zho mine rnabey ley, mazdraa zienal zho ncuane
 runctal xtol zho. Gane zeene pxeel Dios Xpëed me,
 goc me miech (lëeraasi ni tib dol beend me), men
 co gut bdiizh grëse xtol ne, dzigo ga laa me psilaa
 ne ladznia dol.

⁴ Gacxe waa, niinasi zrieelo dziuun ne grë mine
 rnabey ley, per none gdeed ne diidz guional ne
 mine rnabey Espíritu Sant, ni lalnu gdeete ne diidz
 gac mine racladz xcuerp ne nu.

⁵ Grëse zha ne mban zigne racladz xcuerp
 ngoopdol zho, loxaque grë min co rioxco zho; laa
 zha ne mban zigne racladz Espíritu Sant, mine
 rnabey Espíritu Sant rioxco zho.

⁶ Zha ne sca rioxco loxaque mine racladz xcuerp
 ngoopdol zho, nöz ne nitlo zho ga zie zho; sangue
 zha ne rioxco mine racladz Espíritu Sant, laa zho
 zie nöz ne ygaa zho tib guielmban; peet dzeb, peet

zhgab ctsebdraa zho. ⁷ Ni stiba, zha ne rioxco lox-
aque minē racladz xcuerp ngoopdol zho, rlëenie
zho Dios ga, sac nēd zho gban zho zigne rnabey
xley me; ni niicle gacladzga zho, grieelod zho.
⁸ Min cocxe waa, ib rzacd zdoo Dios grē ncuane
run zho.

⁹ Sangue to, mbandraa to zigne racladz xcuerp
to, sinque laa to mban zigne racladz Espíritu Sant.
Sca mban to, sac Espíritu Sant nacie to. Nanle
to ganle zha ne nacie Espíritu Sant, nliid xnēz
Jesús no zho. ¹⁰ Ni to ne nac to zha ne nole xnēz
Jesús, ible zgaa to tib guielmban ndzon, sac laa Dios
psilaale to lo dol. Nli zig nac xcuerp to, ncuane
nitlo naca, sac por dol biaan sca no gaca; sangue
zhiespírituw, nitloda. ¹¹ Dios bleeban Jesús, ni
scagaa telne nli nacie to zhiEspíritu me, meque
cueeban to.

¹² Bets, bzian, nodne dziuun ne ncuane racladz
xcuerp ngoopdol ne, zig nac zeene pe nzëeb ne
low. ¹³ Sac telne grē ncuane co tsienal to, ible znitlo
to; sangue telne gnab to gacnien Espíritu Sant to
csaan tow, dzigo ible zgaa to tib guielmban. ¹⁴ Sac
grëse zha ne zienal zigne racladz zhiEspíritu Dios,
ga rlu ne nlipaa xpëed Dios nac zho.

¹⁵ Golguien ganle, laa Dios bneedz zhiEspíritu me
lo to, sac xpëedle me nac to niina. Tsode to sca
gdziebd to me, zig nac zeene cho tib ngundziin win
nac to lo me. Xpëed me nac ne, gacxe waa zac
tibliladz gnee ne lo me guiab ne: “¡Papá yeen!”
¹⁶ Ni Espíritu coque runquien ne ne nli xpëed me
nac ne.

¹⁷ Nana ne laa ne nacle xpëed Dios, scagaa dzigo
ye ne ible zgaa ne grëtaa ncuane bdeed me lo

Jesús.

Nli zгаа ne lo grē guielndzon ne no Jesús ga, per scagaa none dzian ne grē guielnē niina ne laa ne ngab lo me.

Guielndzon ne naraa guiaad

¹⁸ Guielnē ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guielndzon ne naraa dzian ne. ¹⁹ Zig nac grētaa ncuaane bzaa Dios, masaque quiambēznēw gdziñ dze zeene laa grē zha ne nac xpēēd Dios ygaa lo guielndzon co; ²⁰⁻²¹ sac gon, gal dze co laa guidzliu guiaanmbe lo grētaa ncuaan paat rquiind, lo grētaa guielntseeb ne no low niina. Dios bdeed diidz biaan grē ncuaan co low, per zeene gal dze co, zeene laa grē zha ne nac xpēēd Dios laa lo grētaa guielntseeb, yew laaw laa.

²² Laga quiambēz grē ncuaan co gdziñ dze co, masaque mban raca, rzaca zig rzac tib meñ wnaa ne quiayal xpēēd. ²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zгаа ne grētaa ncuaane gneedz me), mban rac ne quiambiaaz ne gdziñ dze co, zeene laa Dios ctsēē xcuerp rii ne ni ycaania me ne zig xpēēdpaa me.

²⁴ Ndion ne ible zbee Dios ne lo grētaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lēē ranle ne noyac, nod pe nacne yquiambēzraa new, ²⁵ per zeene quiambēz ne tib ncuaane naraa gac, dzigo nodne guieed ne, sinque ine tiblique gac ne yquiambēz new.

²⁶ Ni scagaa zeene lēbdraa ne, riendraa ne zha guñ ne, Espiritu Sant nac meñ ne gacniēñ ne. Zig

nac zeene gzodiidznie ne Dios, tel nesew nanḁ ne zhapaa nonguielḁ gnee ne lo Dios, dzigo Espiritu Sant runcnee ne grē diidz ne rienḁ ne zha nac. ²⁷ Ni Dios ne nac me meḁ ne nanḁaa pe rza zdoo miech, rienḁ me pe rnee Espiritu Sant, sac miḁe racladz Dios gac miḁ co rnab me.

Tsod ncuaaḁe yquiaaqui csaanladz Jesús ne

²⁸ Ndionḁ ne ganle, zha ne nli dib zdoo rleynie Dios, zha ne rioxco gac grē miḁe racladz me, grēse ncuaaḁe rded zho, led lega rdete zhow, sinque no zaatne rquiina lo zho. ²⁹ Ni ndionḁ ne ganle, zha ne nanle me ygab xnēz me, desde mazd glow, pso me zho gac zho zig nac Xpēēd me Jesús. Lo grē zha ne nac xpēēd me, Jesús nac meḁ nroob. ³⁰ Ni grē zha co, laa me quiabedz zho, quiasilaa me zho lo dol, laa zho noyaaḁwen lo me; zeena ygaa zho lo guielḁndzon ne no me.

³¹ ¡Zha nactaa ncuaaḁe lēē runḁ Dios! Nana, tel scataa racnie Dios ne, ¿cho nadienḁ grieelo lega pe guḁ ne? ³² Golgotsaa gwi ne ganle, haxta xpēēd me bdeed me gut xcuent ne, grēse ne ne nac ne miech. Nana, ¿pe lelḁ grē pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguiald glisqui gnē lēda nodziunḁ ne! Sac goḁ, Dioszhal psanḁbe ne lo dol. ³⁴ ¡choot rieguiald ycaadz dolḁ ne! Sac goḁ laa Jesús gutle bdiizh me xtolḁ ne; per brieaban me, ni na laa me zob cue Dios zaatne rieguiald me nac me meḁ non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzianḁ ne guielḁnē, zeene mban rac ne, zeene rtsidilḁ miech ne, ib guiabd ne togo

bod rley_nied me ne. Niicle zeene guie_nd_gaa pe gow ne, guie_nd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rley_nie me ne! ³⁶ Ni zig nac xcuent guie_lgut, laaw raquietaque lo Xtiidz Dios, zaatne rnee: Grēse no ne nac no zha ne ngab lo luu, tibaque noxtseeb no lo guie_lgut; masaque rzac miech no zig rzac zho grē mēcwxiiil ne golle guet.

³⁷ Niicxe peraa waa dieed ne, zdziuu_n ne gan low ni palal csa_nwinda ne, sac Jesús nacie ne; ni rley_niedox Jesús ne.

³⁸ Nanween naa tsod ncuaa_ne yquiaaqui csaanladz Dios ne:
per ni guie_lgut,
per ni guie_lmban,
per ni anjl,
per ni me_ndox,
per ni grē ncuaa_ne noyac niina, grēgaa ncuaa_ne naraa gaca.

³⁹ Niicle grē ncuaa_ne no glaa zhan gbaaw, niicle grē ncuaa_ne no guietraa zhan guidzliuw, niicle grēragaa ncuaa_ne bzaa Diosa. ¡Ni tiba ycada, sac tibaque rley_nie Dios ne! Ni laaw blule me ganle, zeene pxeel me Jesús (me_n ne rnabey ne), me_n ne gut bdiizh grēse xtol_i ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guie_n grēraa zha Israel cho nac Jesús! Rquianē zdoo naa zho nac zho me_nladz naa, tibaque mban rac zdoo naa rsoladz naa zho. Haxta Jesús, haxta Espíritu Sant

nañ ganle rquiad zdoo naa naa niicle maase gdz-ibdee miech naa, maase nitlo naa guia naa zaatne gandraa naa Dios, telne niaca por miñ co laa zho guien zha gbig zho lo Dios.

⁴ Blactaa quiayacniñ Dios zho, ni rond zho xti-idz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleynie zho me. Nzian grë ncuane bnee me gdeed me lo zho.

⁵ Lëë pxozgoldoo zho ga goc Abraham, goc Isaac, goc Jacob, ni lo dii co ga briequia zha ne bded zig menlidz Jesús. Me nac Dios, me rnabey grëtaa ncuane no, ni me rieguial gacnon gzataa dze. Ible sca rieguiala.

⁶ Nana, no zho guiab godcaque grë mine bnee Dios ga ygaa zha Israel. Per led scada. Sinque lëë miñ co rgaa zha ne nlipaa rnaló Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëéd pquianie Abraham, per rëb Dios loxaque Isaac gac cuent zig xpëéd Abraham. ⁸ Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblolé me zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëéd lo zho.

¹⁰⁻¹¹ Ni scasaque xpëéd Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëéd bgui. ¹² Bii zoney Rebec grop mëdyeen co, laa Dios bzooblolé win ne brieelë

Jacob rëb me, ne ible Jacob gac zha non lo Esaú, win ne glo gal. ¹³⁻¹⁵ Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëed co, per ni gard gacnan win zha nac guie|ntseeb, zha nacgaa guie|wen, laa me bzooblote tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaane noyun zho.

Nana, ¿pe zdieets ne guie|ntseeb ga sca run Dios? ¡Led guie|ntseebda! Tib vuelt rëb me lo Moisés: “Zha ne gacladz naa yquia zdo naa, squia zdo naa zho.” ¹⁶ Ga nagon, zha ne runlay me, nacda porne zha rquiaguiba, o rioxcogaa zho ygaa zhow; sinque laa zho rgaaw, porne me rquia zdo zho. ¹⁷ Gotsaa gwi ne ganle zha beenndip me zdo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdo me, rquia zdo me zho; ni scagaa, zha ne gacladz me gunndip me zdo, runndip me zdo zho. ¹⁹ Nana, no zho gnë: “Telne scaw, ¿pe nac dzigo rlisqui Dios mine run miech, tel mezhall rnabey zha nac zho tib tib zho?” ²⁰ Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?” ²¹ Led zha ne run dziin co, zrieelo gzaa zho tib guies zigne gacladztta zho; tib læ ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdziñ dze co. ²³⁻²⁴ Grëgaa zha ne bzooblo me ygaa lo guieIndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. ²⁵ Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo. ²⁶ Laa stib lugar bzeet Osé, zha bnee Dios lo zho, rëb me: “Ngabde to lo naa, per zdziñ dze ne laa to gac xpëed naa, ne nac naa Dios nguiamban.”

²⁷ Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸ sac ziaadyoble gun Dios xquielwxtis me lo guidzliu, zigne bneele me.” ²⁹ Miñ co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaltaa ib bioxcod zho dieñ zha nsilaa me zho lo dol. ³¹ Laa zha Israel, niicle ne rioxco zho run zho grë mine rnabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grë ncuane gunse zho laa zho laa lo

dol. Min̄cocxe waa, zeene laa Jesús biaad, bzhaac zho me zig tib quie ne rriel̄ ni ne riab ne liu. ³³ Lëë min̄ co ga zho bnee lo Xtiidz Dios, zaatne rnee: Sxel̄ naa tib men̄ lo zha Israel, me gac zig tib quie ne griel̄ ni zho; san̄gue zha ne dib zdoo gnalo me, tsod dze ne tso zho guiel̄në, guiab zho pe nacne bnalo zho me.

10

¹ Bets, bzian, ne nlipaa rzaac naa tebaa zha laa grëse zha Israel lo dol̄, tibaque rnab naa lo Dios guien̄ zho gbig zho lo me, zeena laa zho lo grë xtol̄ zho.

² Parga nli ran̄ naa noxco zho gbig zho lo me; per rund̄ zho min̄e no gun̄ zho. ³ Ib rien̄d zho zdoo Dios ral rsilaa me miech lo dol̄, laa zho rzac por min̄e gun̄ zho laa me csilaa zho. Ib nëd zho gun̄ zho min̄e racladz Dios. ⁴ Sac gon̄, laa Dios racladz Jesús gnalo zho zeena guiaan̄mbe zho lo grëse xtol̄ zho; sac Jesússe nac men̄ ne brieelo been̄ grëse min̄e rnabey ley.

⁵ Bzeet Moisés rëb me, zha ne gnalo ley ne lëew csilaa zho, none gun̄ zho grëse min̄e rnabeya; ⁶ san̄gue zha ne gnalo Jesús ne me csilaa zho, nacda dien̄ peraa gun̄ zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rriequia racladz zho quiet me ga stib); ⁷ o guiaabga zho tsie zho zaatne noliu grë ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieebanle). ⁸ Rquiind paraa tsieguib zho csilaa me zho, zig rzac zho zdoo zho,

zig rzac zho ro zho, sca gax lo zho zo me quiamböz me csilaa me zho. Min co nac miñe noseed no miech, rnee no lo zho: ⁹ Zha ne cueero guiab zho Jesús nac meñ ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtoł zho. ¹⁰ Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac miñe rliladz ne, dzigo scaania me ne. ¹¹ Rnee lo Xtiidz me: “Zha ne dib zdoo gliladz Jesús, quitnied me zho.”

¹² Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaane rap me, zdeed mew lo zha ne gnaba lo me. ¹³ Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca miñe gard cho cxeel zha ne tsienee Xtiidz me lo zho, parne gon zho cho nac me. Ni miñ co rzeet Isá, zeene rëb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grëd zho rzoobdi-aga, zig rbiireque Isá, rnee me: “Dios, bui ganle choot nëd gliladz Xtiidz luu, miñe rne naa.” ¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiay-acnañ Xtiidz me. ¹⁹ No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac

bzeetle Moisésa padzeela, zeene rëb Dios laa me ycaania miech stib guiedz, zha ne ib peet riend; zeena tednë zdoos zha Israel, togo ziaa zho biini.

²⁰ Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëeb nia naa lo zho ni naa niacnie naa zho, per pa nion zho xtidz naa, lel gocontseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ² dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios ³ grëtaa ncuaane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianalaque gut zho Lí. Rzac Lí guiendraa zha ne ron xtiidz me, ⁴ dzigo hor co rëb me lo Lí: “Led tibd luu riaan, no zgadz mil zha ne gard yquiitsgzhib lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoos me ble me zho ygab zho lo me. ⁶ Rne naa pquia zdoos me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoos me zho.

⁷ Znu nagon naca: Zha Israel ne bzooblome, zha cose guiaanwen lo me. Laa los demas zho, le_l lozh gacndip zdoo zho, ⁸ zigne zhobneeque lo Xtiidz me, zaatne rnee: “Beenndip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne ran_d; niicle zob diag zho, per rac zho zig rac zha ne peet rond. Ni scataque nac zho haxta lo nadze.” ⁹ Mi_ncoque bzeet rey David, zeene reb me:

Lëeque grë zhilni zho, lëeque grë ncuane row zho,
gac zig len doo ne, len guix ne tsietsobe
zho;

zeena ygaa zho guiel_ne ne riegual_l zho.

¹⁰ Guiaan zho zig tib zha ne ro_ld lo,
guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xto_l zho; ni tednëgaa zdoo zho gan zho laa me rcaania zha stib guiedz.

¹² Nana, tel_ne scataa guiel_nzaac ne bgaa miech stib guiedz ne znu racndip zdoo zha Israel, ¿pe lel_gue dzigo zeene laa zho gbiire guiaanwen lo Dios stib? ¡Zha naczhe grëraa guiel_nzaac ne ygaa miech!

¹³ To ne nac to miech stib guiedz, led nan_le to gan_le, ible Dios bzo naa none naa Xtiidz me lo to. Scagaa naa, dib zdoo naa rioxco naa run_n naaw,

¹⁴ zeena togo soobladz palal zha ladz naa ye zho squi gbig lo Dios csilaa me zho lo xto_l zho. ¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib

guiiedz laa zho biaanwen lo me. Gacxe waa, j̄tib guielbley nrooba zeene laa me ycaania zha Israel stib! Sac gon, rrieequia grieegan zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa.

¹⁷ Bdzin dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per riogual now, gacxe waa no biaan xlugar zhicwa, mine brug ga.”

²⁰ j̄Golgap ciudad gon! Nli lëë biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, j̄pelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. j̄Golgan ganle men nroob nac Dios! ²⁴ Niicxe to na, nac

to zig yag oliv dan, pquia zdoo me to pquiid me to zhicw yag oliv wen co, ipelel zha Israel dzigo yquiad zdoo me, gbiire yquiid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa gre miech stib guiedz blozh wbig lo me, ²⁶ hor co grese zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene reb zho:

Guiedz Siön, ga griee men ne cuee zha Israel lo xquielntseeb zho.

²⁷ Dzigo laa Dios csilaa zho lo gretaa xtol zho, zigne psanle me diidz lo zho.

²⁸ Len dze rii rlee zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale reb me lo gre pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëe xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel ned gon xtiidz me. Per zigne rquia zdoo me to niina, scaquegaa zdziñ dze ne yquia zdoo me zho. ³² Grese miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieelo guien pe nac mine no guic me gun me, pe nacгаа gun mew? ³⁴ Zigne zhobneeque lo Xtiidz me, zaatne rnee: “¡Choot nand pe no guic Dios gun me! ¡Choot grielod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëeb.” ³⁶ ¡Peet gon nzëebd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nase to golsan to lадznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldraa to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoos Dios noyun naa dziin rii, nligaa laa naa rso diidz lo to, ndzinli golgac, ib glude to ncuaane ni nade to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne

nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me guñ ncuaane yquiin lo grëraa miech, none guñ zhow.

Zha ne pso me cseed miech, none miñ co guñ zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho; zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Ganzede to grë ncuaane ntseeb, niapse ncuaane rquiin gołtsienal. ¹⁰ Ine niowse golleynie grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdoo to gołsoxco golguñ miñe nac xtsiin Dios.

¹² Nley golgac lo guielmban rii, gołsoladz ganle zha nactaa grë ncuaane no gneedz Dios lo to; gołxecw lo grë guielnë ne gan to; tibaque gołzodiidznie Dios.

¹³ Gołsoxco xliaadz grë zha ne nacgrë to ngab to lo Dios; zaacse gołcuëzlo zha ne ziaadted lidz to.

¹⁴ Grë zha ne rtsidił to, laa ne gdzibdee to zho, gołnab gunlay Dios zho.

¹⁵ Zha ne no guie|bley, gol|gacnie zho lo xquie|bley zho; zha ne nogaa guie|në, gol|gacnie zho lo xquie|në zho.

¹⁶ Gacniatsde to. Grë zha ne rzac miech peet nond, gol|tsieelsa zho; guiabde to to nac zha ne racraa. Niowse gol|bannie zha ne nacgrë to.

¹⁷ Zha ne csacsi to, gunde to ne yeque to csacsi zho. Gol|tsoxco wen gol|gac lo grëse miech.

¹⁸ Til|niede to samiech to, gol|tsoxco tibaque wen gol|bannie zho. ¹⁹ Gol|guien, zha ne csacsi to, ib guiabde to ne tozhal ctsire guie|në co, sinque gol|sa|na ladznia Dios, metaa na|n zha gun me xquie|wxtis me; zigne ziaad lo Xtiidz me zeene rëb me: “Naa raguial gun guie|wxtis, naa gun|quizh miech tel pe nac dol ne zëëb zho. ²⁰ Gacxe waa, zha ne rlëë lo luu, zeene gan luu mban rac zho rcaabedz zho, mazd bdeed ncuaane gow zho; gan|gaa luu mban rac zho rnab zhis zho, bdeed ncuaane guie zho. Sac zeene sca gun luu, stoladz zho csoladz zho mi|ne been zho luu; rrieequia gui ga cuib guic zho.” ²¹ Gol|guien sca, niapse guie|wen gol|tsienal, zeena sca ycuëëz to lo guie|ntseeb. Gdeete to diidz ne ye to gun guie|ntseeb.

13

Golgon mine rnabey wxtis

¹ Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib

ted zho caxtigw ga. ³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to.

⁴ Dios psan rzo zho ni zha rtedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. ⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nez lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquin dimi co parne grieelo gun zho tel pe nac dziin ne no gun zho. ⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Gre ncuane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grele mine zhobnee lo Xley Dios ga quiayun zho. ⁹ Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzgaa to gre ncuane quianie zho.

Gacxe waa, zha ne rleynie samiech zigne rleynie zho zho, grele mine zhobnee lo Xley Dios ga

quiyayun zho. ¹⁰ Zha ne rleynie samiech, rsac-sidraa zho zho; ni min co rnabey Dios. Gacxe waa, grëse ne none gleynie ne samiech ne.

¹¹ Ib none gban ne zigne racladz Dios, golle na tsaane biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me.

¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne.

¹³ None ndzinli gban ne:

dziuund ne guielgonziu,

dziuund ne grë lni yozh,

yquiangobd ne zha ne led tsieeld ne,

dziuund ne grë guielyozh ne racladz xcuerp ne,

dilnied ne samiech,

glëenied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csaambe me xquielrien ne, csaambe me zdoon ne, gac ne zigne racladz me. Dziuundraa ne grë ncuuaane ndzinlid ne racladz xcuerp ne.

14

Gzeed zdoon to mine run zha ne nacgrë to

¹ Golcaania zha ne gard tsoguicpaa zha nac Xtiidz Dios. Telne no palal mine riladz to zhaa rzac zho, glisquide tow lo zho. ² Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzacгаа wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row, dien cho pe rowdгаа; sac gon grëse to, Dios bzooblo to ngab

to lo me. ⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. ⁶ Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncueegaa ncuaane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

⁷⁻⁸ Sca nagon naca, per led min cod dzieets ne dziuun ne mine gacladztaa ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeeñe guetgaa ne, lo me none gdziñ ne. Gacxe waa, niicle niina ne zomban new, niicle zeeñe gutlegaa new, lадznia me no ne. ⁹ Sac gon, tel Jesús gut me ni brieeban me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me. ¹¹ Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:
grëse miech, ible squuitsgzhib zho lo naa,

cueero zho ne nli naa nac Dios.

¹² Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaane rgobey to yquiaaqui gunctal zho xtol zho, o csaangaa zho Xtiidz Dios. ¹⁴ Tel naa, nanpaa naa led dolđa gow ne grë lose guielwagw; sac niicle Jesús scaque nac xtiidz me. Sangue zha ne rzac dolđa, mazd gowd zhow; sac tel laa zho gowa, xtol zho ga gunctal zho. ¹⁵ Zig rne naa ga led dolđa, per telne xtsiinpaa row to tib ncuaane rquiaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuaane yquiaaqui sozit zho lo Dios! Sac gon, blactaa guielne ne bded Jesús psilaa me zho.

¹⁶ Ib gunde to grë ncuaane yquiaaqui gneenë miech to, niicle ne nanpaa to led dolđa. ¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espiritu Sant); led tsod zho dien pe zac gow zho, pe zac guie zho, pegaa gacda. ¹⁸ Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹ Goltsoxco sca, gunde to ncuaane codil to grë zha ne nacgrë to; zeena tipse gac to lozh tsoguic to zha racladz Dios gban to. ²⁰ Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielđa, nacne gow ne

mine nanpaa ne yquiaaqui csañ ne zdoo stib zho.
 21 Mincoce waa, mazd gowde to pe scuaan bëël, guiede to nziu, telne min co yquiaaqui gunctal to xtol zho; ni tel pe grëraa ncuaane nan to tsod zdoo zho, gunde tow.

22 Niicle ncuaane nanpaa to dolda gun tow, niclegaa nëz lo Diosa led dolda; per mazd gunde tow zeene zo zha ne rzac dola. jWen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

23 Sañgue zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuaane rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

1-2 Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuaane tso zdoo zho, ncuaane yquiin lo zho, zeena lozh guien zho zha gnalo zho Dios; led tsode to gun to ncuaane yquiinse lo to.

3 Golgan ganle, niicle Jesúsa bguibd me niac ncuaane nquiin lo me. Zigne raquietaque lo Xtiidz Dios, zaatne rnee: “Grëtaa diidznë ne rnee zha ne rlëë lo Dios, grësew pcon zho me.”

4 Grëse mine raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne yгаа ne grë mine bzeetle Dios. 5 Dios men ne rneedz guielbley co, men ne racniën ne guieete ne, me gacniën to

niowse gbannie to grë zha ne nacgrë to. Golleynie zho zigne rleynie Jesús to, ⁶ zeena grëse ne tipse gac ne dzioolnie ne Dios, Pxo^z Jesús, meⁿ ndzon ne rnabey ne.

Grëse miech noyon Xtiidz Ndzon Jesús

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobneⁿraa lë Dios.

⁸ Golsoladz ganle, zeene biaad Jesús nroob ncuane been me lo zha Israel, me biaadgun grëtaa mine bzeetle Dios padzeela. Ga blu Jesús grëse mine rnee Dios, ib run mew. ⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,
ni zlu naa lo grë zha stib guiedz ne meⁿ non nac luu.

¹⁰ Stib lugar rnee:

To ne nac to miech stib guiedz,
jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz,
jolleynie Dios! jolsaⁿzuii lë me!

¹² Mincoque ga bzeet Isá, zeene znu pquiaa me:

Zriequia tib meⁿ lo xtii Isá;
meⁿ co gnabey lo grëse miech stib guiedz,
ni me gnalo zho grëse zho.

¹³ Minco^cxee waa, to ne nac to miech stib guiedz, rnab naa lo Dios (meⁿ ne psanle diidz pe nac grë ncuane ygaa ne ga) gneedz me guiebley lo to, gacnie me to peet zhgab ctsebde to niina ne laa

to rliadzle me. Rnab naa lo me, gacnien Espíritu Sant to ine gley to yquiambéz to gac grè mine psanle me diidz ga.

¹⁴ Bets, bzian, nanle naa zha wen nac to, nacde to zha ne csañ zdoo stib zho; rienle to zha racladz Dios gban to, rienle to zha cso to diidz lo grè zha ne nacgrè to; ¹⁵ per lo guits rii gon nzian ncuaane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grè miech stib guiedz, zeena csañmbe Espíritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnien Jesús naa noyun naa dziin ne pso Dios naa. ¹⁸ Me noyacnien naa none naa Xtiidz me lo grè zha stib guiedz, zeena gban zho zigne racladz me. Ni laa zho nobig lo me, sac ran zho grèse mine rne naa mban naaw zigne naca, ¹⁹ ni ran zho zha racnien Espíritu Sant naa run naa grè milagr, grè ncuaane rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nöz xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne wlaataa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. ²¹ Laa naa zanał zigne zhobnee lo Xtiidz Dios, zaatne rnee: “Grè zha ne wlaataa gard gon cho nac me, zeene gan zho grëtaa ncuaane run me, laa zho gunbey me.”

Racladz Pabl tsie Pabl Roma

²² Nzian vüelt gocladz naa nialgan naa to, per ib bdeetew diidz, sac laa naa bia grë dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴ Laa naa no ga Spañ, dzigo lëë nëzle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nëz Spañ.

²⁵ Laa niina, laa naa no ga Jerusalén gasan naa tib gon lo grë zha bets, zha bzian ne no ga; ²⁶ sac grë zha bets, zha bzian, ne no nëz Macedon, ni nëz Acay, laa zho bnediudz been lo zho palal dimi cxeel zho yquiin grë zha prob ne no nëz co. ²⁷ Niapse zdoo zho gol ptop zho gon co, sac rzac zdoo zho grëtaa miñe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaane rgaa lo zho yquiin zha Jerusalén.

²⁸ Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. ²⁹ Rien naa nroob guielnzaac ne gneedz Dios lo to zeene laa naa guial.

³⁰ Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espíritu Sant nacnie ne. Gane niina, laa naa rnab lo to, golgotsaa gnab ne lo Dios gacniën me naa; ³¹ golnab lo me, csilaa me naa ladznia grë zha Israel ne gard guiën cho nac Jesús. Gólnab lo me, iñe gley grë zha bets ne, zha bzian ne, ycaania zho gon ne gasan naa lo zho nu; ³² zeena iñe nley no zdoo naa glanso naa lo to, iñe gdziiladz naa len dze ne cuëz naa lo to

i. Sca nagon no guic naa, totsaque gneedz Dios diidz gaca. ³³Ni me ne nac me men ne rbee miech lo grëse zhgab, lo grëse guielxtseeb, me gacniën to. Sca gaca.

16

Bdiuzh

¹Bets, bzian, len dze rii laa Feb, tib wnaa ne run xtsiin Dios guiedz Cencré, laa me guiaad nëz lo to i.

²Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuane yquiin me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

³Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziuun no xtsiin Jesús, ⁴haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grëragaa zha zit ne nacgrë new, rzac zdoo zhow.

⁵Ni scagaa, grë zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnëz Jesús.

⁶Goldeed zhibdiuzh naa lo Marí, blactaa noyun me xtsiin Jesús lo to.

⁷Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëë stib zha ne rdzieel xtidz naa ga; ⁹ lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuaane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rililadzle Jesús; ¹² lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

¹³ Goldeed zhibdiuzh naa lo Ruf, zëëb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëë stib xnia naa ga, blactaa pteedlo me naa. ¹⁴ Goldeed zhibdiuzh naa lo Asítric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne rililadz Jesús nëz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdrea Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run zho, sinque laa zho noxco ncuaane gdeed guxt xcuerp zho. Diidz nex, diidz ndooladz rnee zho; grë miech ne beelze pe rililadz, znuse rquidie zho zho.

¹⁹ Sangue to, zëeb diidz ne ib rsaande to miñe nac Xtiidz Dios, zianał to miñe rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaane yquiin gun to, ni lalnu tsoode to lo guiełntseeb. ²⁰ Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnien to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús. ²³ Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne rliladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacnien to grëse to. Sca gaca.)

²⁵ Laa naa rsan to ladznia Dios, me gacnien to lozh sodziits to lo Xtiidz me, miñe none naa lo miech. Haxta zeeñe gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen. ²⁶ Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni miñe rnabey me miñ co no gun zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca. ²⁷ ¡Mese nac Dios, mese nac men ne nlipaa rien! ¡Tibaque sca golgotsaa

dziuu²non ne me, grëse ne ne nac ne zha ne ngab
lo Jesús! Sca riegui¹a.
Pabl

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files
dated 29 Jan 2022

5317ca58-7555-5e4c-a420-e1e9210e2df2